

"POLITIKO"AREN EGUNKARI EZKUTUA

(erdararik euskaratua, noski)

MI DIARIO

21 de Julio: Con eso del
Bai Euskarari, pues no se
me ponen a hablar en
euzkera, pero que se creen?
asi que, les he dicho lo
que les tenia que decir,
mientras daban el primer paso.

Maiatzaren 12. Gogorra izan da, benetan, gaurko biltzarrea. Joan den larunbatean Carrillo-rekin Madrillen zertaz hitzegin nuen galdetu didate Komitekoek. Noraino iritsiko ote dira kankailu horiek beren ausardian? Ez dute ezertxo ere ulertzen politikaz. Isiltasuna eta izkutua behar dira aurren-aurrenik politika egiteko. Bestela dena lardaskatu eta kakaztu egiten da. Eta, jakina, ez diet ezer esan; eta ez esango ere. Gero, akordioa lortzean, orduan bai; orduan agertuko dugu jokoak. Eta orduan ere, noski, herriak uler dezakeena bakarrik. Gainerakoa orduan ere ez da esan behar.

Maiatzaren 24. Antton, Kepa eta Errodrigok baja eman dute alderdian. Carrillo-rekin hitzegin nuena azaldu ez nuela-ta, ez omen daude gertu barruan segitzeko. Hau mauka! Bakea bederen eman dezatela analfabeto horiek!

Ekainaren 3. Gaur ere eztabaida latza gure biltzarrean. Jende gutxi etorri da. Beharrik! Landabehere-ko bi gazteen heriotza dela-ta, gure alderdiak Agiri bat ateratzea nahi zuten. Hori astakeria! Gazte batzuek beren buruak alferrik hil nahi baldin badute, zer egingo dugu politikook? Bide horrek ez darama inora. Baina zozoekin gauza hauek eztabaidatzeak ez du sentidurik. Hildako bi gazte horiek "gudariak" direla esatea nahi zuten. Jakina: ez

dute lortu. Ezin dezakegu guk politika-jokoak horrelako txatxukeriengatik arriskutan jar. Eta ez dugu jarriko.

Ekainaren 5. Heranegungo ukoa dela-ta, Henrikek, Tomasek eta Laxarok alderdia uztea erabaki dute. Hau bakea!

Ekainaren 18. Bart ere gogor jarri behar izan nuen gure biltzarrean. Iparraldeko ikastolak larri daudela-ta, gure alderdiak Agiri bat bederen ateratzea nahi zuten, edo Hazparneko kantaldian guretako batek hitzegitea. Zertarako, ordea? Guk hemendik ezin dezakegu han ezer egin, geure burua kaltetu baizik. Horixe behar genian, ordea! Baionako arazoetan muturrak sartu, eta gure alderdia hemen debekaturik gertatzea! Eta, gero zer? Nola egingo genuke politika?

Ekainaren 23. Mattin, Eufonio, Tomas, Elena, Sorne, Joxepa eta Eudivigis-ek baja eman dute. Españolismora lerratzen ari omen gara. Ez dute ezertxo ere ulertzen! Gu politikook gara, politikook; eta berak ez! Errealista izan behar dugu; eta, errealista izanda, Iparraldeko arazoak ahaztu egin behar ditugu. Greziak Anatolia-ko lurraldeak galdutzat ematen dituen bezalaxe, guk ere lau probintzietan jokatu behar dugu.

Uztailaren 5. "Gestorak" eta ez dakit nork deituta, larunbatean manifestazioa laguntzeko eskatu digute.

Dudarik gabe lotsagarria da gerta dena: Araba ere pre-autonomikoa aparte gelditu da. Baina, zer lortzen du kaleetan harrika hasita? Nork ez du amnistia politikokoek lortu zutela, abiltziaz eta jukutiaz; eta ez txoro-pandero haiek kaleetan barrena astoarena ezinez? Hain zuzen ere, kale-nahastetako ero hauek ari dira dena hondatzen ekonomia, jendeen konfiantza, dena. Eta gu, politikook, hemen gaudela, behin eta berriz geure eginkizuna ezin eginik. Noiz geldituko ote da jendea etxean, behar bezala? Noiz egingo dute gazte txoropalda horiek egin behar dutena? Ikasi, etsaminak ondo prestatu, gerorako beren burua zaildu eta gero, bidez, taxuz, behar dena.

Uztailaren 8. Armentia, Eufrasio, Sisebuto, Jacques, Joanes, Pedro, Jaurrieta, Leire eta Erkuden-ek baja eman dute alderdian. Politika baina, nunbait, "tirapiedras" izan nahiago dute... Ondo da. Baina halako batez gomazko pelota batek begia hondatzen badie, ez datozela hona gupitza bila!

Uztailaren 21. Pitokeriak gertatu izan dira maiz gure biltzarretan; baina atzokoa aparta izan da zinez. BAI EUSKARARI kanpaina dela-ta, euskaraz ez al zaizkit ba hasi Jon, Ibone eta Luziano? Argi eta garbi esan diet esan behar zitzaiena: "El problema del vascuence es un problema político. Dejamos de chorradas voluntaristas". Ez dute batera ulertu erantzun didatenaz (hitzak batzu bakarrik, erdaraz botaiak: diglosia, soziologia, eta abar. Hori al da euskara batua?...). Gogor jarri behar izan dut: "Esto no es una academia de lenguas. Aquí estamos unidos para hacer política". Eta hau entzutean, altxa eta joan egin dira hirurak.

Uztailaren 23. Jon, Ibone eta Luzianoren eskutitz bana hartu dut. Baina eman dutela! Ongi egin dute. Sekula ez dute ulertu politika egitekotan, euskararen arazoa mingarri izanik, altxa batera utzi behar dela. Euskara gero ez gaur, ez inolaz ere politikaren kaltetan.

Abuztuaren 6. Atzo ez zen biltzarrean inor ere etorri. Baina, egia esateko, ezer galdu ahal dugu? Ez dut usteko. Aski izan dira, benetan, entzun diren txorakeriak. Ez biltzea hobe, horretarako. Orain bai. ORAIN HASIKO NAIZ POLITIKA EGITEN!! Hau poza!

Bihar Madrillera noa, Carrillorek afaltzera. Etzi bazkaria Fraga-rekin; eta etzidamu Afganistan-era, "Conferencia Mundial de la Energía" delakora beste 7.500 politikarekin. Horixe biltzar politika!

Baina dohain hau, hortik zehar esan ezin badaiteke ere, ez zaio edono eman. Eta hauxe da kakoa!